

Un malur en mountagno

Lou dimènigie 4 dal mes de Madalèno de 1937

Li ancians de Barver s'en navison encaro èiro dai premiers omes que si soun deroucas aqui-n-amou en Dregoulasco souto lou Mouffiès.

Ero lou dimènigie 4 dal mes de Madalèno de 1937, à la fi de l'aprè-dinar que li Barverencs an sòupu que i èro en malur en Dregoulasco, que douis omes èron toumbas e que caiò anar li quère damou. Es M. Maurice Baudoin qu'aiò pouscu escapar à la mouort qu'èro cala lis avertir.

Georges Robini, Romain Laurenti, Jules Gasiglia, Prosper Laurenti, Albert Ghintran, Auguste Godbillot et Jean Franco soun pias su-lou-còu, à 9 ouros de sero e soun aribas à la taulo de nèu qu'èro 3 ouros de mati. N'an rè pouscu, de nuech, traire lis omes que s'éron agantelas dintre la crabasso e qu'éron mouorts. S'en soun recalas à la vilo.

Lou dilun, li gens dal Club Alpi de Niço me lou President, M. Inghadi si soun ourganisas e an prepara toute lou materiel. Soun partis lou dimars qu'èro encaro nuech (i èro lou Priou, M. Magnico, M. A. Gasiglia e M. Jules Laurenti).

Lou premier qu'an trach (èro 10 ouros) es M. Jean Milhau. De Villerroy e Auguste Godbillot èron calas à-dintre la crabasso. Lou segount, Dieudé-Defly, es agu trach per Albert Ghintran e Jean Franco (Soulino).

An fach li panaus su la nèu per calar li couòrs fint en Gravièros doun soun aribas à 3 ouros, perdu'èro pròpi malèisa. A 5 ouros, èron à Cour-de-l'Evo e à 6 ouros à Barver. Aquí, an mes li mouorts à la Capèlo dai Negres e moulou de gens de Barver soun vengus per recounfourtar li famihos.

Li famihos an manda, per remerciar li Barverencs, 2000 liros per li paures de la Coumuno. Per memòirio, an mes na plaquo en Dregoulasco.

I avié jà mai d'ena trentèno d'ans que Vitor de Cessole aiò fach lou rifujou de Niço e li nouostros couolos coumençavon à estre en pouè rouaus, ma quel malur es agu lou premier, e a marca la memòirio dai Barverencs. Despi, malurousamen, n'i a agu d'autres que si soun tias aqui-n-amou, sigue per rouar su li couòlos, sigue per anar quère lou genepi...